

Bosna i Hercegovina
FEDERACIJA BOSNE I HERCEGOVINE
AGENCIJA ZA NADZOR OSIGURANJA
FEDERACIJE BOSNE I HERCEGOVINE
S A R A J E V O

"Službene novine Federacije BiH", broj 81/06

Na osnovu čl. 8., 10. i 20. Zakona o društvima za osiguranje u privatnom osiguranju (« Službene novine Federacije BiH », broj 24/05) i člana 16. Statuta Agencije za nadzor osiguranja Federacije Bosne i Hercegovine, Stručni savjet Agencije za nadzor osiguranja Federacije Bosne i Hercegovine, d o n o s i

P R A V I L N I K
O USLOVIMA ZA OBAVLJANJE AKTUARSKIH POSLOVA

Član 1.

Ovim Pravilnikom propisuju se uslovi za stjecanje i povlačenje zvanja ovlaštenog aktuaru, te vrste i sadržaj dokumenata potrebnih za dobijanje ovlaštenja za obavljanje aktuarskih poslova, u skladu s Zakonom o društvima za osiguranje u privatnom osiguranju (u daljem tekstu: Zakon).

Član 2.

Ovlašteni aktuar je lice koje ima ovlaštenje za obavljanje aktuarskih poslova u skladu s Zakonom i provedbenim propisima.

Član 3.

Pod aktuarskim poslovima u smislu Zakona i ovog Pravilnika smatraju se poslovi davanja stručnog mišljenja u vezi s: završnim računom, godišnjim izvještajem o poslovanju društva, poslovnim aktima društva i njihovoj primjeni, te drugi poslovi u skladu s odredbama člana 20. Zakona.

Sadržaj i način dostave mišljenja iz stava 1. ovog člana propisani su Uputstvom, koje je sastavni dio ovog Pravilnika.

Član 4.

Ovlaštenje za obavljanje aktuarskih poslova izdaje Agencija za nadzor osiguranja Federacije Bosne i Hercegovine (u daljem tekstu: Agencija za nadzor), u skladu s članom 12. ovog Pravilnika, licu koje ispunjava slijedeće uslove:

- da je državljanin Bosne i Hercegovine ili strani državljanin s boravištem u Bosni i Hercegovini;
- da je završilo ekonomski, prirodno-matematički fakultet (studij matematike ili fizike) ili neki od tehničkih fakulteta;
- da ima položen ispit za ovlaštenog aktuaru u skladu s članom 6. ovog Pravilnika;
- da nije osuđivan za kaznena djela koja se odnose na finansijski kriminal ili kršenje javnih i profesionalnih dužnosti;
- da je član aktuarskog društva sa sjedištem u Bosni i Hercegovini (u daljem tekstu: aktuarsko društvo);
- da mu do sada nije bilo oduzeto ovlaštenje za obavljanje poslova ovlaštenog aktuaru.

Dokumenti kojima se dokazuje ispunjavanje uslova iz stava 1. ovog člana su:

- uvjerenje o državljanstvu, a za stranog državljanina kopija pasoša i potvrda o boravištu u Bosni i Hercegovini;
- uvjerenje, odnosno diploma završenog fakulteta;
- potvrda Agencije za nadzor o položenom ispitu iz člana 5. ovog Pravilnika;
- uvjerenje o nekažnjavanju izdano od nadležnog organa, a za strane državljane uvjerenje nadležnog organa zemlje čiji je državljanin;
- potvrda o članstvu izdanu od aktuarskog društva;
- izjava lica da mu do sada nije bilo oduzeto ovlaštenje za obavljanje poslova ovlaštenog aktuaru.

Dokumenti iz stava 2. ovog člana ne smiju biti stariji od tri mjeseca od dana podnošenja prijave. Kopije dokumenata moraju biti ovjerene kod nadležnog organa.

Strani državljanin, pored uslova propisanih stavom 1. ovog člana, prilaže i dokaz o znanju jednog od službenih jezika u Bosni i Hercegovini, te radnu dozvolu izdanu od nadležnog organa. Službeni prijevodi i kopije dokumenata moraju biti ovjereni kod nadležnog organa.

Član 5.

Ispit za ovlaštenog aktuaru obuhvaća predmete:

- vjerovatnoća i matematička statistika,
- ekonomika osiguranja,
- računovodstvo osiguranja,
- modeli doživljenja,
- stohastičko modeliranje,
- statistika osiguranja,
- finansijska matematika,
- osnove investiranja i upravljanja finansijskom imovinom,
- aktuarska matematika I,
- aktuarska matematika II,
- pravo osiguranja,
- životno i neživotno osiguranje,
- zdravstveno osiguranje,
- penziono osiguranje.

Program pojedinih predmeta iz stava 1. ovog člana i literaturu propisuje aktuarsko društvo uz saglasnost Agencije za nadzor.

Član 6.

Ispit za ovlaštenog aktuaru polaže se pred Komisijom za polaganje ispita (u daljem tekstu: Komisija).

Komisija se sastoji od pet članova i sekretara. Članovi Komisije su po jedan iz: Federalnog ministarstva financija/finansija, Agencije za nadzor i aktuarskog društva i dva člana iz reda stručnjaka iz oblasti osiguranja, privrednog prava ili finansija. Sekretar Komisije je iz Agencije za nadzor.

Komisiju i sekretara iz stava 2. ovog člana imenuje direktor Agencije za nadzor.

Sjedište Komisije je u Agenciji za nadzor.

Način rada Komisije propisat će se Poslovnikom o radu, koji donosi direktor Agencije za nadzor.

Predsjednik, članovi i sekretar Komisije imaju pravo na naknadu koju utvrđuje direktor Agencije za nadzor.

Član 7.

Prijave za polaganje ispita za ovlaštenog aktuara podnose se Agenciji za nadzor.

Uz prijavu kandidat je dužan priložiti i dokaze da ispunjava uslove iz člana 4. ovog Pravilnika izuzev dokaza za uslov iz alineje 3. stava 1. člana 4. ovog Pravilnika.

Istovremeno sa podnošenjem prijave kandidat podnosi i dokaz o uplati naknade za polaganje ispita, koju utvrđuje direktor Agencije za nadzor.

Kandidat koji je prijavio ispit i uplatio naknadu za polaganje, ali nije pristupio polaganju, može polaganje ispita prijaviti u narednom ispitnom roku, bez uplate naknade.

Naknada iz stava 3. ovog člana predstavlja ostale prihode Agencije za nadzor i koristi se za pokriće troškova organizacije i polaganja ispita.

Član 8.

Komisija utvrđuje postupak provodjenja ispita.

Član 9.

Komisija sastavlja zapisnik o obavljenim ispitima za ovlaštenog aktuara i dostavlja ga Agenciji za nadzor u roku od 8 dana od dana polaganja ispita sa naznakom za kandidata da je položio, odnosno nije položio ispit.

Član 10.

Kandidat koji nije položio ispit za ovlaštenog aktuara može se prijaviti za ponovno polaganje ispita nakon isteka šest mjeseci od dana polaganja ispita.

Ispit se može polagati najviše tri puta.

Član 11.

Agencija za nadzor odlučuje o priznavanju položenog ispita – nostrifikaciji, na osnovu ovog Pravilnika uz mišljenje Komisije i to pojedinačno po slučaju, poštujući princip reciprociteta.

Član 12.

Agencija za nadzor na osnovu izvještaja Komisije izdaje uvjerenje o ovlaštenju za obavljanje poslova ovlaštenog aktuara (u daljem tekstu: uvjerenje) osobi koja je položila ispit u roku od 30 dana od dana dostavljanja izvještaja.

Član 13.

Agencija za nadzor vrši nadzor nad ovlaštenim aktuarima.

Agencija za nadzor će oduzeti ovlaštenje za obavljanje aktuarskih poslova ovlaštenom aktuaru ukoliko:

1. je ovlaštenje dobiveno na osnovu neistinitih podataka,
2. teže krši pravila aktuarske struke, nesavjesno obavlja dužnosti propisane Zakonom,
3. je pravomoćno osuđen za kazneno djelo koje se odnosi na finansijski kriminal ili kršenje javnih ili profesionalnih dužnosti.

Član 14.

Agencija za nadzor vodi registar izdatih i oduzetih uvjerenja.

Svako izdavanje ili oduzimanje uvjerenja Agencija za nadzor objavljuje u «Službenim novinama Federacije BiH».

Član 15.

Lice koje posjeduje ovlaštenje Federalnog ministarstva financija/finansija za obavljanje poslova ovlaštenog aktuara, izdanu na osnovu Pravilnika o uslovima za dobivanje ovlaštenja za obavljanje aktuarskih poslova (« Službene novine Federacije BiH », broj 54/00), smatra se ovlaštenim aktuarom u skladu s odredbama Zakona i ovog Pravilnika.

Agencija za nadzor će licima iz stava 1. ovog člana izdati uvjerenje u skladu s ovim Pravilnikom.

Član 16.

Ovaj Pravilnik stupa na snagu osmog dana od dana objave u «Službenim novinama Federacije BiH».

PREDSJEDNIK STRUČNOG SAVJETA
mr. Zaim Hećo, v.r.

Broj: 1.0. – 021 – 586-12/06
Sarajevo, 28.11. 2006. godine